


古國幽情記

下卷

說部叢書第三集
第三十二編



商務印書館印行

此書著者於十五年前奉派至俄留學時正值李

文忠專使在俄與俄國訂立密

外交情形洞如觀火

故於俄國皇族及民黨之

俄羅斯宮闈秘史

雙方之勢力消長如數家珍

大文豪託爾斯泰一段議論

特色今俄國已四分

其來由此書不可不讀也

元 335)

中華民國十年九月刊版

(古國幽情記三冊)

(每部定價大洋捌角)

(外埠酌加運費匯費)

纂者 寒

訂者 洽

行者 商

刷所 務

行所

百處

風雷

商務印書館

上海北河南路北首寶山路
商務印書館

上海棋盤街中市
商務印書館

北京天津保定奉天吉林長春龍江濟南
東昌太原開封洛陽西安南京杭州蘭谿
吳興安慶蕪湖南昌九江漢口武昌長沙
商務印書分館

重慶成都重慶瀘縣達縣梓潼
雲南貴陽石家莊哈爾濱新嘉坡
商務印書分館



此書有著作權翻印必究



古國幽情記下冊

第四篇 丹涅斯

第二十一章 奇異之婚禮

美麗哉。坎德國人之建築思想也。而丹涅斯尤爲全國精神聚會之所。誠可謂坎德之樂園。蓋其建築是城之意。將作爲全國貴冑富豪結婚時大禮堂之用。於是極意經營。務使無一處不令人起美術之觀念。全城山水明瑟。樓臺亭榭。倒映碧波。處處人畫。而其建築品。又無一不取白色。清潔無纖塵。卽所蒔花卉。亦皆純白。其國風俗。結婚之禮。以白色爲尙。所以表凡人愛情。當清淨貞潔也。城中風景夷猶。陽光淡盪。極目四望。惟林木蒼蔚。芳草芊緜。處作碧色而已。卽予今日拈毫著畫。附案頭匪供。亦多白色之花。猶令人迴想當日游踪。瞑目而思。似燦若爛銀。瑩

如琢玉之城郭。宛在目前也。坎德全國風景之美。萃於丹涅斯。丹涅斯全城風景之美。萃於意雪絲寺。全寺皆白石所築成。玉棟飛雲。珠簾捲雨。清氣往來。殊令人有超凡出塵之想。寺中所植。大都爲梔子花。月下香。白玫瑰。繡球。瑞香等。白色之花。卽池中芙蕖。亦屬純白。如逢月夜。蟾魄下臨。天地一色。冰雪晶瑩。芬芳馥郁。予等一入是城。如登仙境。及入寺中。則更若置身瓊樓玉宇間。舉凡前此所過諸城。如曼尼佛之莊嚴。耐德倭凱脫之靚麗。耐倭曼之繁華。與是間相較。殊覺塵俗煩囂。不啻有仙凡之判也。駐守斯寺及執役其中者。多係祝髮僧尼。妙齡少女。遁入空門。冀邀後福。祈禱之外。輒散步花間。仙袂飄飄。超然霞舉。鬢影衣香。中人欲醉。凡此種種。使世界名畫家見之。美術院中。又不知可添幾許畫稿矣。寺中所祀。爲意雪絲神。神爲女像。專司人間婚嫁事。霧鬢雲鬟。容貌姚冶。妙目清揚。奕奕如生。翦水雙瞳。正不識閱過人間幾多佳耦。而癡男怨女。未諧伉儷者。亦復來此頂禮。

輒得默佑。如願以償。故香火甚盛。惟是此間婚禮。有特殊之點。既繁重。亦且奇異。遠不如歐俗之輕簡易行。誠以坎德國俗。視婚嫁事極嚴重。一與之齊。終身不改。是以結婚之禮節。亦至審慎。寺中正殿之外。繚以長垣。垣外爲齋室。新郎新娘皆須前一夕。屏去侍從。入室齋戒。男女異室。不相謀面。迨結婚之夕。則由妙年女尼。先導新郎徐步迴廊。穿過萬花叢中。登正殿。至神前宣誓。宣誓既畢。仍由女尼送之入室。復導新娘登殿宣誓。誓畢亦如之。迴廊之中。奏悠揚之樂。花叢之內。和以清脆之歌。而奏樂者。唱歌者。皆容貌豔麗之女尼。歌中之旨。皆勉勵新人之言。繼警戒之語。如非佳偶及非心中之真愛者。切勿勉強聯合。凡此皆所以代神詔示新人之微意也。新人若聞此警惕之詞。而不中輟者。最後乃聞家庭幸福之歌。蓋所以示釵鈿之約既堅。後此當琴耽瑟好。共敦閨房之樂也。此外則又由女尼故弄狡獪。以覘新入之道力堅定與否。當入室齋戒時。皆由女尼供役使。而此女尼

者。又無一不姿容曼妙。皆故作狎暱之詞。妖豔之態。目挑心招。以惑新郎。新郎若稍一游移。則婚姻之約。可以立毀。昔曾有人假此行其報復者。蓋男女相悅。欲結爲夫婦。亦既有成言矣。男忽中變。復戀他人。此女憤甚。乃祝髮爲尼。後男子與所歡來寺結婚。適女值其齋室。遂誣以曖昧之詞。婚約遂解。此男子乃末由得妻。潦倒終其身。故後此入寺者。乃有鑒於此。終日閉戶蟄處。不敢與尼通一言。及入殿宣誓時。更不敢一斜視。恐亂心曲也。二人既俱已宣誓。至中夜。新郎乃入新娘室。攜之登殿。復由大祭師爲之主婚。宣讀婚約。於是夫婦之局乃定。迨黎明。而男女兩家之親戚。皆入寺爲兩新人賀。賀畢而夫婦偕歸。婚禮至是始告終。惟王族之婚禮。則殿旁另有園亭。爲駐蹕之所。名意雪絲園。亦於先一日入居。不處齋室。所以示體制之尊崇也。予等既至丹涅斯。先居於行宮。瑪鐵后亦於同日至。別處他宮。宮皆在寺側。建築已久。以備王族結婚之所居。既而大祭師鄔泰珊亦至。此次

爲主王族之婚禮而來。他人婚嫁。雖名爲大祭師主婚。實則大祭師事集不輕至。其職務皆委他祭師爲代。必爲王族主婚。始一蒞耳。予等旣居離宮。卽有典禮之官。來謁可威。詢用國中舊俗與否。抑須另訂新禮。可威欲一覩此國奇異之風俗。乃主用舊禮。典禮之官旣去。可威笑謂予曰。予等在英倫研究古學時。豈曾夢想來此作新郎。且所娶者爲一國之母后哉。予曰。今婚禮雖將舉行。然大局尙不能定。君於此時。更宜事事留意。可威曰。君可勿憂。苟后不中變者。事可謂大定矣。予曰。后心誠不至中變。惟予總不能釋然於懷。特未識結婚時。予能隨君同入否。可威曰。此事乃不之知。可使人問之禮官。惟乘此未入寺以前。同往一游。俾預知其中之佈置。想無不可。言已。予等遂行。旣至寺門。守門者皆僧侶。知來者爲日儲。乃導可威入應居之園亭。亭凡三室。中備齋戒起居。左餐室而右浴室也。室中陳設暨几榻帷幕。皆純白不染纖塵。四圍雜蒔花木。其後卽爲入正殿之門。可威欲啓

門入。門反鎖。乃使人啓之而入。予欲隨行。守者堅阻。予乃獨留亭中。以待可威之出。既而可威觀覽已畢。乃出門。仍偕予返離宮。可威使侍臣問禮官結婚時可否。令人隨左右。侍臣既去。可威卽告殿中之形狀。謂一切結婚所用之物。皆預備妥貼。陳設殿中。此殿甚廣。四圍曲廊洞房。千門萬戶。至爲幽邃。因予此次婚禮。與佛羅大婚時典禮相同。故啟後殿。備二人先後在神前宣誓。後相見時所居。此間景色清幽。繚以短垣。有小門通出入。入門後。有小橋流水。淙淙有聲。君試思之。如此清絕之景。月明人靜。與意中人把晤其間。寧有異羽化登仙耶。惜乎予所婚者。爲瑪鐵后耳。予聞言愕然。知可威終不能忘情於游珊蕾也。又恐撩其愁緒。一發難收。乃急以他語亂之曰。然則如此仙境。屆時果能隨君同入。一展覽之否耶。可威曰。此事恐不能許君。此間婚禮極嚴肅。想君祇能送我至園亭之中。且卽園亭之中。恐君亦不能久留也。言未已。侍臣來覆命。果如可威之言。可威復笑謂予曰。是

不難。天下有志者事竟成。吾等苟久居是國者。君焉能不論娶。娶時。予當命典禮之臣。特闢是殿以居。君夫婦。吾苟握政柄。君又何事不可遂所欲耶。予曰。予乃非計。予結婚時之安適與快樂。予蓋欲觀君與后結婚後。在此中若何情況耳。君今舉行婚禮。需時須兩夕之久。予一人獨守是間。得勿苦寂寞耶。可威復笑曰。予既娶后。後此當長日與后同居。君寂寞之時正多。乃獨苦此兩夕耶。予所以亦望君之早娶也。且君兩夕後。即可於黎明時入寺。至殿中賀我。予曰。諾。吾此時當送君入寺。苟能設法伴君者。當密隨君左右。否則予等相見。當在君成禮後矣。予與可威談論至此。意雪絲寺中已飭鹵簿來迎可威。可威卽登輿而去。予卽自其後隨之。入意雪絲園。可威乃下輿偕予入亭。亭中已設晚膳。祇備一人之食。可威乃獨享之。膳畢。卽有人如僕相者。導可威入浴。復有人如糾儀者。傳語令侍臣俱退。於是予不得不出園。乃與可威珍重握別。一人獨歸行宮。思此婚禮之奇異。實爲各

國所無。繼又念可威既遵其國俗。一切皆非素諳。任人牽率。得毋煩厭否。最後乃思及佛羅不來。必病體未減。而游珊舊不預大禮。想係侍佛羅之疾。不能離之而行。然此二人不來。於可威亦殊有益。既少一敵人。又少一情人。不致爲可威婚禮之阻格。想可威從此可安然結婚。成禮之後。情有專屬。且國事執掌。兒女私情。或可稍減。再不至有意外之虞。可威運命。殆可入康莊矣。

第二十二章 佛羅之死

翌日。爲可威結婚之日。此事若在歐洲舉行。予爲可威之至友。必預婚禮。伴之入禮拜堂。襄贊一切。今在是國。乃了無所事。寂寞行宮。一人獨處。無謬甚矣。但未識可威在齋宮。作何情狀。想彼一轉瞬間。卽擁豔妻。御高位。握大權。正預計婚禮既成。明晨卽御正殿。受百官萬民之朝賀。後來之幸福孔多。必不如予此時胸中之抑塞也。正思慮間。忽耐德倭凱脫公主之宮奴監范都來謁。予見其無端而來。頗

滋疑慮。後忽憶及予前此辭游珊蕾時。曾語予如有關於可威之消息。當令范都轉告。今來必非無故。急詢之曰。汝來何爲。詎非將主命耶。范都曰。然。主命我告。顧問。今日日儲婚禮。顧問必與日儲偕。不可離側。予曰。何爲。豈有人將不利於日儲耶。范都曰。此意主未明言。然微聞今日佛羅乃冒病微行來此。其中必有隱謀。故須顧問往佐日儲。預爲之防。予曰。予本不欲離日儲。顧格於此間婚禮。不能居日儲之側何。范都曰。是固然。然苟日儲有命者。彼等亦不能違。惟今已無及。此時已不能入寺面日儲矣。予曰。然則將奈何。范都曰。容吾徐思之。少頃當有以報命。遂匆匆而去。范都既行。予焦急萬狀。初謂鄔泰珊暨佛羅已能退讓。不復抵抗可威。今乃知其不然。彼等雖無聲無臭。曾無些微之朕兆。顯露於外。實則暗中進行甚急。不知可威此時處楚歌四面。仇人包圍之中。亦有所覺察否。然苟無人告語者。可威必仍夢夢。決不料青廬之中設陷阱也。雖范都語極含渾。亦不能明言彼等

所施之計畫何如。要之此局決非安穩可知。所望者。可威幹練。今丁此一髮千鈞之時。能隨機應變耳。予候范都。久久不至。思彼若不來。則決無人將此消息。使可威知之。以孤身而羅網羅。勢必無幸。可威休矣。旣而忽報有一僧侶求見。予曰。入之。視之則范都也。予大喜曰。汝必設策能使我入寺見可威矣。答曰。然。吾改服裝而來。蓋爲此也。請顧問速與我易衣。今佛羅方居寺後之私邸。必於夜間入寺。君可於傍晚在左近候之。隨與俱入。人見君爲僧侶。必不致疑而究詰也。予曰。然則君盍亦衣此衣。與我偕往。多一援助。不更愈乎。范都曰。不可。此間神寺規律。嚴肅更甚於禁鑲。苟非寺僧。無端不得入寺。况今爲日儲與后結婚之日。禁衛森嚴。更異往昔。設爲所覺。罪不容於死。惟顧問與日儲同來。亦爲大神所命。今易僧衣入殿。卽事發亦不能以國律繩君。時已將晚。予等遂易衣。從後戶出。范都引予至佛羅私邸之前。別予而去。予一人乃往來於邸之左近。徘徊瞻眺。夜色蒼涼。暝烟四

合。疏星點點。漸現空際。一輪皓魄。亦自遠處濛氣中。磅礴而出。斜掛樹梢。予隱身暗陬。目注寺後之門。不敢稍瞬。恨不能飛越而入。既而漸見有黑影三四。從佛羅之私邸而出。漸行漸近。迨經過予之身旁。細覘之。確爲佛羅。由數人扶之前行。待其既過。予急起。躡足隨之。行過一叢莽。忽有人突出。自後握予之肘。予大驚。思予此來。詎已爲人所覺。乃阻予耶。急迴首視。則仍爲范都。耳語予曰。君見日儲。須堅囑其今晚宣誓後。萬不可離殿。寧婚禮不成。不可就后。此爲至要之言。故特來語君。言已。飄忽而逝。斯時佛羅距予已數武之遙。至門次矣。予急上前追之。將至。覺尙有人追逐予後。予見後門已啓。佛羅將入。乃無暇審來者之爲何如人。急隨佛羅入門。門者亦不予究詰。追者亦全集至。如驚鴻一瞥。擦予身而過。予乃始終未辨其面貌。諸人旣入。門者卽下管鑰。予潛從佛羅之後。經門闕無數。皆曲折幽暗。最後抵一長廊。始見月光。廊外爲廣庭。庭之彼端。卽爲正殿。殿之基礎。皆白石所

築。高峻不能攀跖。想欲登殿者。非循廊從其後入。卽須由正面石級而登。殿下廣庭之外。卽爲縣亘之長垣。有門無數。想門外卽爲結婚者之齋室。而主族所居之齋宮爲園亭。園亭亦在垣外。予乃迴想可威之齋宮。昨日與之同來。似在殿之左偏。斯時予急欲入可威之齋宮。與可威言事。乃棄佛羅。循廊而出。歷左廡。廡內皆有人聲。似方誦夜課。幸廡下無人。予潛踪經過。未爲所覺。廡盡卽爲門。門無數。皆嚴扃。此時予乃不知何門可達可威之宮。然卽審其門。亦未由啓。且卽使可啓。設可威已入殿宣誓者。則予出此門亦徒勞無益。今爲時已迫。不如仍返來時之路。由廊登後殿。以俟可威。然後再乘機進言。意既定。卽返身行。時兩廡僧尼。夜課已罷。復作意雪絲之歌。歌聲嘹亮。琴韻悠揚。予乃乘此聲中。縱步直前。旣達來時之廊下。復循廊前進。乃抵通後殿之石級。拾級而登。級盡處。爲殿之後軒。軒內通殿之處。皆係長窗。窗皆嚴閉。推之不稍動。惟一扇微啓。予乃側身而入。旣入。陡暗黑。

莫辨東西。蓋殿外得月光。睹物皆了了。殿內無月。又不燃燈。黝黯如入地窟。乃循牆摸索而進。行久之。覺隨處有門。可戲謂其中千門萬戶。入者不辨方向。必迷不得出。此語非虛。矧予在暗中。更不知何門可達。殿中結婚之禮堂。乃隨意欲啓一門。竭力搜索。竟無關可拔。力推挽之。又毫不爲動。則不得不舍而之他。盲進既久。終莫能啓一門。胸中焦灼。思再不得門而出。時機旣失。於行禮之前。不復能見可威。而語以險狀矣。幸最後乃達一處。於門罅中透漏微光。由罅外窺。知射入者爲神龕前之琉璃燈光也。然此罅祇能窺見神龕。不能遍矚堂中。作何形狀。惟私心得此。亦已大慰。謂旣見神龕。當離可威宣誓之地不遠。再進苟得罅。必可望見可威。旣見可威。則卽不得門而出。亦可呼可威使人引予出此。於是予索門罅之心。較得可威爲急。旣而果得之。且較前罅爲大。全堂景物。皆可收入此罅之中。大喜過望。反自謂得此善地。藏身有所。苟見可威。卽可呼與耳語。於是打疊全神。由罅

外矚。則所見之景象。與予所希望者大繆。此間確爲禮堂。其中陳設華美。燃燈數盞。皆光華燦爛。前此所見之燈。乃神龕前之燈。神龕與禮堂。隔以重幕。帷帳低垂。乃不復見幕中神像。幕上滿綴鮮花。純作白色。幾疑此幕爲花所成。幕前敷白色之地氈。氈之中央。一美婦人亭亭玉立。霧縠冰綃。差可擬月中仙子。諦視之。則瑪鐵后也。惜此時游珊蕾不在側。若在側者。素娥青女。競鬪嬋娟。美人粉本。非復人間世畫工所能夢見矣。然游珊蕾雖不在后側。而后側確尙有一人。在理。此時在后側者。當爲可威無疑。孰知審視。乃爲佛羅。然則予所急欲望見之可威。果何在耶。可威雖不得見。然佛羅在此。決非無因。予可以於此時。竊視其意欲何爲。乃息心靜氣以俟之。則見佛羅方倚殿柱而立。顏色灰敗。爲狀甚憊。屢舒其氣。似久語乍畢。以靜待后之報章。而后則堅凝不動。若殿中新塑美女之石像。兩人對立。堅持不下。旣忽聞后言曰。佛羅吾子。汝頃所語。意太酷毒。吾爲汝母。焉能聽汝而

行。佛羅憐笑答曰。母以兒言爲毒耶。不知母所飲之毒藥。較兒言爲多。母尙不聽兒言。則真甘醢如飴矣。后毅然言曰。汝勿絮絮。予決不聽汝。且汝與日儲何仇。而必不許予之下嫁耶。佛羅冷笑曰。母非憤憤。尙不知兒之隱痛耶。彼虜甫入國。卽欲却予之王冠。據予之寶座。然此着尙可恕。兒本多病。已早敝屣富貴。故一任其篡竊。乃彼猶不足。復奪予心最寶貴最摯愛之物以去。此物被奪。實不啻戕予之生命。不仇是人。又誰仇者。后曰。汝言何指。佛羅慍曰。母勿故作癡聾。兒愛游珊蕾。游珊蕾初亦愛兒。誰不知之。乃彼虜一來。而游珊蕾遽變其初心。回面向兒。雖經兒殫精竭慮。以冀挽回。亦終無效。縱誓之以死。亦不復能動游珊蕾絲毫憐惜之心。苟非彼虜陰爲鬼蜮者。游珊蕾決不至是。兒能不腐心切齒於其人耶。后聞言笑曰。汝言誤矣。此事乃不關日儲。罪在游珊蕾。須知游珊蕾苟不改其初心。雖百日儲。亦安能誘之易操。汝乃不怨游珊蕾而仇日儲也何故。佛羅怒曰。母愛日儲。